

重修蓮溪陸氏宗祠並建新（祔親）祠碑記

夫先王製禮特教以報本追遠之誠後世立祠宜臻於繼志述事之善蓮溪陸氏宗祠重脩並建新（祔親）祠恢宏先緒其亦知所務矣予維陸氏名望堪欽其遠祖諱迅號海源宋金青光祿大夫二世祖諱卓居三水縣作吏端州歷數傳至九世祖諱明德郡廩生始遷居肇慶再歷數傳十一世祖諱振遂卜居於新江之蓮塘乃陸氏之始祖也由是似續相承孫曾蕃衍惟振祖之嫡姪孫諱斐如其始創祠宇一區畧展敬宗睦族之意然事屬草創規模未備況經風雪凋殘日月侵蝕於茲垂數百餘年使猶因循坐廢則牆崩木朽大虧斐祖之初心迄於今三房定議振祖裔孫如漢等同心合力始以聯族姓之歡一舉重脩終欲答祖宗之德於是鳩工與作雁序營謀蓋經始於癸卯年季秋九月落成臘月也前堂後寢增式廓則步武雍容東序西階美奐輪則觀瞻壯麗休哉盛矣然予之所望豈徒在寢廟奕奕者良以過庭思孝入廟思敬歷代先祖之靈於此而安也四時禮祀之禮於此而行也左昭右穆之倫於此而敘也入孝出弟之誼於此而敦也可以正人倫馴風俗安知亢宗肖子之奇不堪上迪前光下昭奕葉耶今陸氏修祠告竣宗人咸屬予為記予之所望者以此則不僅在丹青之浮艷與祭祀之虛文而已矣

里人邑庠生亨衢趙學鑣拜撰

總理 秀林 監生 以柏 如登 如湘 錦球 紹昆

大清光緒廿九年歲次癸卯季冬吉  
祀孫 職員 伏基 職員 周桂 監生 以樞 職員 如陵偕眾孫敬立